

Simon Thomas AC
Cadeirydd y Pwyllgor Cyllid
Cynulliad Cenedlaethol Cymru
Tŷ Hywel
Bae Caerdydd
CF99 1NA

28 Mawrth 2017

Annwyl Simon

Ysgrifennaf atoch yn dilyn fy llythyr ar 4 Tachwedd ynghylch Adroddiad eich Pwyllgor yn craffu ar Gyllideb Ddrafft Comisiwn y Cynulliad 2017–2018. Fel y gofynnwyd yn Argymhelliad 3, dyma roi'r wybodaeth ichi ynghylch y tanwariant a ragwelir mewn perthynas â'r arian a gafwyd i gyllido Penderfyniad y Bwrdd Taliadau, gan ddangos sut y caiff y tanwariant hwn ei ddefnyddio gan Gomisiwn y Cynulliad (mae'r manylion yn yr atodiad ynghlwm).


Fel yr esbonnir yn yr atodiad, mae pob tanwariant yn cael ei nodi yn ganolog ac yn cael ei gyfuno ar gyfer y Bwrdd Buddsoddi ac Adnoddau er mwyn gwneud penderfyniad ynghylch y blaenoriaethau o ran buddsoddi. Yn ddiweddar, bûm mewn cyfarfod y Bwrdd Buddsoddi ac Adnoddau er mwyn arsylwi'r broses o wneud penderfyniadau ar waith; yn bendant, mae'n broses drylwyr, â thrafodaeth ddigon cadarn yn ogystal â digon o herio.

Mae'n debyg ei bod yn werth ailadrodd y byddwn bob tro'n ystyried yr opsiwn o ddychwelyd cyfanswm y tanwariant o gyllid y Comisiwn os nad oeddem yn ystyried bod gennym ddigon o gyfleoedd buddsoddi ar gael i'r Comisiwn er mwyn defnyddio'r cyllid sydd ar gael yn effeithlon ac yn effeithiol. Oherwydd y lefelau uchel o alw a phwysau nas gwelwyd mo'u tebyg ar gyllid y Comisiwn o'r blaen, nid dyna fu'r achos yn ystod blwyddyn ariannol 2016–17.



Os hoffai eich Pwyllgor gael unrhyw wybodaeth bellach, rhowch wybod i mi fel yr arfer.

Yn gywir



Suzy Davies AC

Comisiynydd y Cynulliad / Assembly Commissioner

cc Comisiynwyr y Cynulliad, Claire Clancy, Nia Morgan

Croesewir gohebiaeth yn Gymraeg neu Saesneg / We welcome correspondence in Welsh or English



Atodiad

Adroddiad y Pwyllgor Cyllid yn craffu ar Gyllideb Ddrafft Comisiwn y Cynulliad 2017–2018

Ymateb Comisiwn y Cynulliad i Argymhelliad 3: *Mae'r Pwyllgor yn argymhell y dylai Comisiwn y Cynulliad roi'r wybodaeth ddiweddaraf yn fuan cyn diwedd y flwyddyn ariannol, gan fanylu ar y tanwariant a ddisgwylir o ran yr arian a ryddhawyd i gyllido penderfyniad y Bwrdd Taliadau a chyfiawnhau sut y mae Comisiwn y Cynulliad yn defnyddio'r tanwariant hwn.*

Er nad oes un maes tanwariant y bwriedir gwario arno'n uniongyrchol, rhoddir blaenoriaeth i wariant sy'n ymwneud ag Aelodau'r Cynulliad. Yn ystod 2016–17, er enghraifft, bu i'r Bwrdd Buddsoddi ac Adnoddau, sy'n cynnwys y Prif Weithredwr a'i huwch staff, gymeradwyo defnyddio'r tanwariant i fuddsoddi mewn gwaith i greu ystafelloedd pwyllgora newydd, gwella diogelwch Aelodau yn eu swyddfa etholaeth a'u cartref, ac, yn fwyaf diweddar, mewnosod system i warchod cyflenwad pŵer y Senedd. Ceir manylion llawn yn y papur hwn.

Penderfyniad y Bwrdd Taliadau

Bwrdd Taliadau Cynulliad Cenedlaethol Cymru yw'r corff annibynnol sy'n gyfrifol am bennu cyflogau, pensiynau a lwfansau Aelodau'r Cynulliad a'u staff. Yn ôl deddfwriaeth, mae'n ofynnol ar Gomisiwn y Cynulliad i sicrhau bod digon o gyllid ar gael i dalu am y Penderfyniadau a wneir gan y Bwrdd. Gosodir cyllid yn flynyddol ar sail 100 y cant o'r cyllid y mae galw amdano gan y Penderfyniad. Gan mai cyllid yn ôl y galw ydyw, sydd angen ei ariannu, mae gosod y cyllid ar sail 100 y cant yn cael gwared ar unrhyw risg y gallai'r hyn y gelwir amdano gan y Penderfyniad effeithio'n wael ar feysydd eraill o gyllid y Comisiwn. Arian y Comisiwn yw'r arian a neilltuir i Benderfyniad y Bwrdd Taliadau, ac adnodd i'w ddefnyddio gan y Comisiwn yw unrhyw danwariant.

Rheoli'r Gyllideb

Caiff pob tanwariant ei nodi yn ganolog a'i gyfuno er mwyn i'r Bwrdd Buddsoddi ac Adnoddau wneud penderfyniadau am y blaenoriaethau o ran buddsoddi. Mae hyn yn hanfodol, gan mai dyma'r modd yr ydym yn cyllido gwaith buddsoddi angenrheidiol, gan weithio gyda'r cyllid sydd ar gael. Os na fyddem yn gweithio yn y modd hwn, sef rhagweld pa danwariant fydd ar gael, byddai angen swm cyllid ar



wahân at ddibenion buddsoddi, gan alw am ragor o arian i Gymru a chynyddu'r tebygolrwydd o gael cyllid heb ei ddefnyddio yng nghyfanswm cyllideb y Comisiwn.

Yn yr hydref, byddwn yn dechrau ar y gwaith o asesu cyflwr ein cyllideb ac yn ystyried ein cynlluniau ar gyfer gweddill y flwyddyn, a bydd yr asesiad hwn yn dwysáu wrth i'r flwyddyn fynd rhagddi. Os, ar unrhyw bryd yn y flwyddyn, nad oes gennym gynlluniau cyllido sy'n addas, yn briodol ac yn cynnig gwerth am arian, byddwn yn ceisio creu cyllideb atodol er mwyn i unrhyw arian dros ben gael ei roi yng Nghronfa Gyfunol Cymru.

Ein hamcan yw sicrhau bod y Comisiwn yn cyflawni gwasanaeth o safon sy'n rhoi'r gwerth gorau bosibl i'r pwrs cyhoeddus. Gwneir hyn drwy gynllunio cyllideb arbenigol, drylwyr a thryloyw sy'n destun gwaith craffu gan eich Pwyllgor chi, y Pwyllgor Cyfrifon Cyhoeddus, Pwyllgor Archwilio a Sicrwydd Risg y Comisiwn yn ogystal â'r Comisiwn ei hun. Rydym wedi gwneud cynlluniau manwl sy'n golygu bod gennym syniad ynghylch anghenion gwariant yn y tymor hir (e.e. cynllun ar gyfer ailwampio dros gyfnod o 10 mlynedd). Gan na allwn drosglwyddo arian o un flwyddyn i'r llall, mae'r drefn hon – sef nodi gwaith y gellir ei flaenoriaethu – yn golygu na fydd angen dychwelyd arian dros ben a gofyn am ragor o arian mewn blynyddoedd i ddod. Y dewis arall fyddai gohirio gwariant, sy'n ddull a fyddai'n debygol o olygu cynnwys cyllidebau wrth gefn sylweddol.

Atgoffir staff yn gyson nad yw'n dderbyniol gwario ar eitemau diangen neu eitemau nad ydynt yn helpu cyflawni nod strategol, a dylai pob gwariant gynnig gwerth am arian. Mae deall esiampl y Bwrdd Adnoddau a Buddsoddi a'r Comisiwn o'r defnydd y dylid ei wneud o arian yng nghyd-destun llywodraethiant corfforaethol yn sicrhau y defnyddir arian i gyflawni nodau strategol y Comisiwn yn unig.

Tanwariant tybiedig a buddsoddiad 2016–17

Yn ystod y flwyddyn, caiff yr holl gyllideb ei fonitro ac adolygir rhagolygon bob pythefnos. Y tanwariant tybiedig ar gyfer 2016–17, yn weddill o'r swm a neilltuwyd i ddiwallu anghenion Penderfyniad y Bwrdd Taliadau, yw £1.9 miliwn.

Er ei bod yn amlwg yn weddol fuan yn y flwyddyn ariannol y byddai tanwariant sylweddol yn weddill o'r swm a neilltuwyd i ddiwallu anghenion y Penderfyniad,



roedd hefyd yn glir bod angen sylweddol ar fyrder ar adnoddau'r Comisiwn yn 2016–17, yn deillio'n arbennig o'r hyn a ganlyn:

- cynnydd yn nifer y pwyllgorau a'r wythnos fusnes estynedig;
- heriau cynyddol i'r Gwasanaethau Diogelwch ar ystâd y Cynulliad;
- angen am ragor o drefniadau diogelwch yn bersonol ac yn swyddfeydd yr Aelodau yn sgil llofruddiaeth Jo Cox AS;
- blaenoriaethau'r Comisiwn a'r Llywydd newydd, gan gynnwys sefydlu senedd ieuencid newydd a gwella ein gwasanaethau newyddion a gwybodaeth yn ddigidol;
- newidiadau cyfansoddiadol yn sgil Deddf Cymru 2017 a Brexit;
- pwysau ar yr ystâd yn y tymor byr a'r hirdymor o ran anghenion llety; a
- rhaglen FySenedd sydd â'r nod o greu senedd agored, ddigidol o'r radd flaenaf trwy wella'r modd yr ydym yn rheoli ac yn defnyddio gwybodaeth, gwasanaethu Aelodau ac ymgysylltu gyda'n holl ddefnyddwyr drwy gyfrwng technoleg.

Bu i'r gwaith cynllunio capasiti a gynhaliwyd ym mis Hydref 2016 adolygu'r galw cynyddol hwn yn fanwl, a chynllunio y bydd angen i adnoddau staffio ddiwallu'r galw. Yn ystod 2016–17, cymeradwyodd y Bwrdd Adnoddau a Buddsoddi ddefnydd y tanwariant ar gyfer y meysydd buddsoddi pennaf, i'w gweld yn y tabl isod.

Disgrifiad	Swm
Gwaith ar y Llawr Gwaelod (Ystafelloedd Pwyllgora ychwanegol)	£1.185m
TGCh Ystafelloedd Pwyllgora	£0.202m
Prosiect y Swyddfa Gyflwyno	£0.048m
Prosiect Cofnod y Trafodion	£0.078m
Diogelwch gwell yn swyddfeydd etholaethol yr Aelodau	£0.040m
Gorffen Ailffitio'r Siambr	£0.261m
Gwydnwch pŵer gwell	£0.140m
Cyfanswm	£1.954m

Bydd dogfen ein hadroddiad blynyddol a chyfrifon ar gyfer 2016–17 hefyd yn cynnwys manylion llawn am ein gwariant yn ystod y flwyddyn ariannol hon.

Comisiwn y Cynulliad
Mawrth 2017

